

Najib Tampilkan Barisan Terbaik Bagi Realiti Politik Masa Kini, Kata Zambry Bernama
15 May, 2013

IPOH, 15 Mei (Bernama) -- Menteri Besar Perak Datuk Seri Dr Zambry Abdul Kadir berkata Kabinet Datuk Seri Najib Tun Razak yang diumumkan hari ini adalah barisan terbaik yang mampu berdepan dengan realiti politik masa kini.

Katanya Perdana Menteri menampilkan barisan pemimpin yang berwibawa melalui gandingan tenaga muda dan golongan berpengalaman.

"Perdana Menteri faham dengan realiti politik masa kini yang memerlukan barisan Kabinet yang berintegriti dan boleh merealisasikan aku janji kepada rakyat," katanya.

Beliau juga melahirkan rasa gembira apabila barisan Kabinet itu turut diwakili tiga menteri dan tiga timbalan menteri dari Perak.

Mereka ialah Menteri Kewangan Kedua Datuk Seri Ahmad Husni Hanadzlah, Menteri Dalam Negeri Datuk Seri Dr Ahmad Zahid Hamidi, Menteri Pelancongan dan Kebudayaan Datuk Seri Mohamed Nazri Abdul Aziz.

Timbalan Menteri Luar Datuk Hamzah Zainuddin, Timbalan Menteri Belia dan Sukan, Datuk M.Saravanan serta Timbalan Menteri Pertanian dan Industri Asas Tani, Datuk Tajuddin Abdul Rahman.

Di MELAKA, Ketua Menteri Datuk Ir Idris Haron menyifatkan barisan Kabinet itu sebagai dinamik, bertenaga dan tangkas dan mampu berdepan dengan cabaran yang lebih besar.

"Ia menampakkan keseimbangan dan kesediaan untuk berhadapan dengan cabaran yang lebih besar di masa hadapan," katanya dalam kenyataan.

"Sudah pasti negara maju berpendapatan tinggi menjadi sasaran dan program-program transformasi kerajaan akan menjadi enjin utamanya," katanya.

Selain itu, Idris berkata barisan Kabinet tersebut disifatkan boleh dipercayai dan dekat di hati rakyat.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=950067>